

KANTON SARAJEVO

Vlada Kantona Sarajevo

Na osnovu čl. 6. i 26. Zakona o Vladi Kantona Sarajevo ("Službene novine Kantona Sarajevo", br. 7/96, 10/96, 20/98 i 4/01) i člana 3. Poslovnika Vlade Kantona Sarajevo ("Službene novine Kantona Sarajevo", broj 2/02), Vlada Kantona Sarajevo, na 102. sjednici održanoj 4. jula 2002. godine, donosi

UREDBU

O SLUŽBENOJ ISKAZNICI ČLANOVA VLADE KANTONA SARAJEVO

Član 1.

Ovom uredbom propisuje se obrazac, izgled i način izdavanja službene iskaznice (u daljem tekstu: iskaznica), premijera i člana Vlade Kantona Sarajevo (u daljem tekstu: član Vlade), zamjena i vođenje evidencije o izdatim iskaznicama.

Član 2.

Članu Vlade se izdaje iskaznica.

Iskaznica sadrži podatke o identitetu člana Vlade, kao i kratak izvod o imunitetskim i drugim pravima koja mu pripadaju po osnovu ustava, zakona i drugih propisa.

Član 3.

Iskaznica je javna isprava.

Član Vlade je dužan nositi iskaznicu i pokazati je nadležnom organu, kada se na osnovu iskaznice koristi imunitetskim ili drugim pravom.

Član 4.

Obrazac iskaznice izrađen je na punom papiru i zaštićen omotom od prozirne mase.

Iskaznica je pravougaonog oblika, dimenzija 90x55 mm.

Iskaznica se izdaje prema obrascu koji je odštampan uz ovu uredbu i čini njen sastavni dio.

Član 5.

Iskaznicu izdaje Vlada Kantona Sarajevo, a istu potpisuje premijer.

Poslove pripreme i izrade iskaznice obavlja Stručna služba za zajedničke poslove.

Član 6.

Iskaznica vrijedi od dana izdavanja do dana vršenja dužnosti.

Po isteku mandata član Vlade je dužan iskaznicu vratiti sekretaru Vlade koja se nakon toga poništava.

Član 7.

U slučaju gubitka iskaznice, član Vlade je dužan, najkasnije u roku od tri dana od dana gubitka, obavijestiti premijera, odnosno sekretara Vlade.

Nova iskaznica izdaće se nakon što se izgubljena iskaznica oglasi nevažećom u "Službenim novinama Kantona Sarajevo".

Član 8.

O izdatim i zamijenjenim iskaznicama, sekretar Vlade vodi knjigu evidencija.

Evidencija iz prethodnog stava sadrži:

- redni broj;
- ime i prezime člana Vlade kojem je iskaznica izdata;
- serijski broj iskaznice;
- datum izdavanja;
- datum vraćanja;
- datum oglašavanja nevažećom;
- potpis člana Vlade koji prima ili vraća iskaznicu.

Član 9.

Ova uredba stupa na snagu danom donošenja, a objavit će se u "Službenim novinama Kantona Sarajevo".

Broj 02-05-13126-5/02
4. jula 2002. godine
Sarajevo

Premijer
Nermin Pećanac, s. r.
